

晚

晴

移

詩

匯

晚晴移詩匯卷一百九目錄

潘世恩 九首

戴敦元 九首

英和 二首

李宗瀚 十四首

周系英 一首

趙佩湘 四首

吳貽詠 二首

李廷芳 一首

張懷淮 二首

宋茂初 六首

宋繩先 一首

王曇 四首

金孝槐 一首

蔣湘培 十一首

歐陽輅 十五首

王以銜 二首

陳廷桂 六首

沈樂善 一首

周有聲 八首

喬遠炳 一首

郭楷 五首

商景泰 一首

李實 二首

徐炘 八首

李光庭 六首

魏瀚 二首

黃其勤 一首

聶元樟 一首

王燧 八首

耿玉函 一首

馬惠 二首

路斯亮 一首

張璿華 一首

晚晴移詩匯卷一百九

徐世昌

潘世恩初名世輔字槐堂號芝軒吳縣人乾隆癸丑一
甲一名進士授修撰官至太傅武英殿大學士予告
重與鹿鳴恩榮兩宴謚文恭有思補齋詩集

詩話文恭相宣宗垂二三十年世不甚傳其相業而
在翰林時嚴拒和珅文宗初年疏薦林文忠皆表
表者詩自寫胸臆有清超之致

詩彖歌

九龍之麓梁谿旁詩骨乃有名山藏文字精靈一點埋不
得熊熊奕奕萬丈騰光芒古今詩人代有幾大抵蒼蠅附
驥尾啾啾嘯出鮑家墳至今寂寞荒煙裏晴沙先生選詩
一千一百有十人殘編斷簡堆積高於身何來賈生出奇

計瘞之石穴千載留其眞君不見伯鸞不作長康死名士
風流長已矣白楊樹下冢累累地角天涯竟何是精魂寄
與殘詩俱萍聚沙搏偶然耳朽壤誰爭牛耳盟故鬼豪吟
新鬼喜我思英雄事業才人詩一例皆欲流傳之選家意
見各區別滄海豈必無珠遺儻使構檻采桷供博探安在
單詞隻句不與風雅相扶持蘇合苔封付巖藪姓名零落
知誰某得無地下修文廣額收光怪不許人間有嗚呼冢
中詩魂兮聽我歌筆將汝掃墨汝磨生前曷不驅吟魔龍
蛇蚯蚓一抔土賢愚同盡將如何

和劉春齡

榮顯

游法源寺觀海棠有懷胡其園之作

探幽乘暇日小立佇花前人去已千里春歸又一年柳含
香雨重松抱法雲圓半晌增惆悵重來翠接天

陽明山人銅印歌和石庵師元韻

讀書學道不適用一腐儒耳非英雄先生少負經世略
騏驎一出凡馬空批鱗折角遭譴責隻手欲捧樽桑紅龍場
兀坐素患難生徒壁立和春風豁然中夜有心得直如天
地開屯蒙擒賊擒王一舉手叱嗟呼嘯風雷從良弓善藏
飛鳥盡上追濂洛傳心宗晚年再出平諸寨秋鷹凜凜當
霄翀功大德修世所忌誰與前席陳深宮先生出處自了
了當時謠詠何其工豈知正學在宇宙皎若日月行天中
龍蛇尺蠖會屈蟄鼯鼠之技慙終窮先生壽世三不朽理
學經濟文章通摩挐遺印倍珍重爲想品詣千秋隆

將赴都門率瑩綬兩兒至吾與庵徧游白雲法螺藕
花諸精舍

勝游極目向郊原
厭說驪駒已在門
客似閒雲慵出岫
僧如野鶴喜乘軒
偶隨犬吠尋花徑
直送泉聲到水源
留得四山新記好
他年重認雪泥痕

六月二十四日鍾仰山侍郎

昌

黃樹齋太史

爵滋

招

同吳蘭雪刺史

嵩梁

張亨甫明經

際亮

淨業湖觀

荷

寒蟬先秋鳴涼意在樹杪
卧聞檐雨止起視瑣窗曉清風
來不速引我至瓊島中央
一水亭四面萬花繞主人兩宗
匠仙葩入品藻坐我香世界
煙波淩浩渺同游皆俊才吳
質本詩老爲言卅年前此地
留鴻爪風流感晨星陳迹忽
已杳及茲花生朝一壺共傾
倒珠露舞翠盤游魚躍文沼
飛來雙白鷺顧影鬪清好一
官挂朝簿世事常擾擾所欣

半日閒心迹冰壺皎歸來枕簟清香風滿懷抱

三月十九日同人集花之寺看海棠

花事今如許春光又一年
恰逢新雨後難得薄寒天
宿酒朝猶殢輕陰晝欲眠
最宜文字飲此地況幽偏

五年輭紅裏不到贊公房
笑我如老杜無詩及海棠
今來訪名友得此占羣芳
爲爾留春住門前車馬忙

贈朱西生孝廉

綴

去年花時我入闌瑤瑤萬卷手自披擬收珊瑚歸鐵網
豈知滄海明珠遺暗中何必無朱衣五色到眼終迷離
但憑玉尺定去取得者固喜失者悲勸君酒酣且莫悲
蛟龍騰躍會有時東坡偶然失李廌永叔畢竟成劉幾
我今奉使日鞅掌黃金臺畔馳征騑聞君挾策來京師
一時聲譽滿

帝畿又聞試官得宗匠駿馬惟有孫陽知如磁引鐵珀拾
芥好與風雅作總持道逢九烈不我欺已將柳汁染子衣
綠肥紅瘦吾當歸讀君杏苑看花詩

中秋對月有懷

退直蕭閒晝掩扃晚來步屨向中庭秋高但覺星辰近人
定微聞風露馨三五夜看金鏡滿八千里望白雲停奎垣
坐對冰心印應念寒窗鐙火青

戴敦元字金溪開化人乾隆癸丑進士改庶吉士授刑

部主事官至刑部尙書諡簡恪有戴簡恪公遺集

符南樵曰金溪尙書持躬節儉侃侃有直聲多賦豔
情真宋廣平之賦梅花無足害也其落花詩云便
芳菲都是客不須搖落已成秋何其淒感乃爾後
官封疆至尙書詩不礙人之禍命於公驗之矣
詩話簡恪清介絕俗居官直行己意而經緯縝密非
矯廉不近人情者比詩於近體沈江頃王廟云千古

英雄曾墮淚當時豎子亦成名
漂母祠云巾幗偶然存慷慨
塵埃何必辨英雄氣象灑落
可見一斑其流連風景之作
取徑幽秀如疏星渡漢留無
跡敗葉翻鴉墜有聲蟋蟀吟
殘星入戶芙蓉開徧水通門
是處殘月路又添吟思惱
鵝鴨皆不似達官語
釣臺

統易紹先帝交難留故人名州亦多事
垂釣竟終身天象許爲客雲臺無此臣
逸民存舊傳東漢俗還淳
捫蘿凌絕徑臺石本天成到此一回首
悠然心跡清千重青嶂合一片碧流平
歸路茫茫遠仙風送我行

江行望會稽諸山

孤帆晴破白雲圍遙指南江澹翠微
吳越春秋饒霸跡會稽山水有清暉
卧薪烏喙旋成業浮海鴟夷竟不歸
文采風流至今在柯亭蘭渚辨依稀

長路

天光盡處是平原
目斷寒榛望欲昏
人語夕陽聞遠渡
馬鳴春草識遙村
白麀奇木終童對
鵬鳥湘江賈傅魂
長路關心自消遣
獨憐幽意向誰論

擬古

少小慕遠游
偶與神仙遇
蓬萊水清淺
無梁徑飛渡
曖曖雲際居
樓閣森無數
雙成吹瑤笙
餐我五色露
導我謁羣真
玉京容小住
上拍洪厓肩
下躡王喬屨
顧盼意自豪
鍊景期久駐
慧業豈後人
仙骨惜未具
海風浮空來
三山忽迷誤
一落萬丈強
咫尺塵沙路
天上與人間
宿夢遽然寤
靈藥終何存
忽忽歲云暮
獨坐有所思
抑鬱將誰訴
回頭謝世人
那得知其故

扁舟

扁舟千里病中行
漚影塵光幻結成
脈望窺星真異事
卽且甘帶亦多情
眼前夢任他年醒
身後名從此日爭
且索
詒癡符一卷不教人笑橐裝輕

分水廟

雲散星馳不盡流
滯人江海思悠悠
出山豈特分清濁
歧路無端感去留
咫尺便成千里別
縈迴難挽百年愁
最憐
萍葉隨波去
夜夜寒情上客舟

太白樓

賈生天折平子愁
雲龍上下安可求
離騷一卷付流水
眼底突兀維高樓
樓頭黃鶴飛不去
云是太白曾游處
萬歲
千秋身後名
朱薈碧瓦城邊路
玉京羣帝朝元都
呼吸沆

漉餐醢醢鸞皇不屑受控馭一笑撒手浮江湖開寶中年
富文藻奇才肯放東山老淩雲一賦沈香亭太息知卿恨
不早長安市上無地眠華陰道中催吟鞭快攜謝眺驚人
句茫茫四顧投雲天九關虎豹耽耽視不見靈妃啟玉齒
常教紀瘦怨黃泉無復汪倫照潭水解衣歸卧徂徠陰竹
溪日暮寒煙沈掉頭有約遲巢父抱膝無聊弄伯禽賀監
平生最蕭瑟白首金閨情乍暝鑑湖一曲沙棠舟越女三
年留不得風塵滿目忽相逢別有傷心感慨同十千沽取
蘭陵酒黃墟小飲愁恩恩興酣拔劍忘今古滄洲五嶽低
樽俎粟飛鬼哭號夜烏石破天驚散秋雨浮雲蒼狗歎紛
更河北無端鼓角鳴蜀道古曾哀望帝夜郎天遣戍長庚
文章浩氣西風勁壯士悲歌掩明鏡知己何似汾陽王故

人賴有當塗令落盡楊花放白鵬扁舟姑孰又生還青山
枯骨猶餘戀金粟前身若等閒蓬萊三度成清淺法輪留
待蓮花轉此樓不共劫灰寒一任雲煙自舒卷當時誰識
謫仙人遺跡空揚陌上塵閒殺看花憔悴客十年人海尙
迷津

感懷和雲帆

尙嫌尸素腐儒餐痛飲悲歌總眇歡嬾拙豈便從後進疏
狂終礙作高官抗心竹帛招沈魄放眼煙霄送逸翰各有
千秋須努力莫將駒隙等閒看

英和字樹琴號煦齋晚號耄叟滿洲旗人乾隆癸丑進
士改庶吉士授編修官至戶部尙書協辦大學士有
恩福堂詩鈔

詩話嘉道之際陰雨堅冰膏曳以大司農入相奮欲有所建白坐事遷謫戍黑龍江三年召還得刁公巖園居築別業題曰觀頤山墅居十年乃卒終未再起論者惜之

新草

階下幾莖草離離青未勻池塘空有夢邊徼忽驚春時不遺微物天原育至仁待看平野徧訪舊動雙輪

書韓蘇桃花源詩後

曾聞涿郡有三坡納賦年年父老過莫認桃花源舊路滿山風雨落英多

李宗瀚字公博一字北溟又字春湖臨川人乾隆癸丑進士改庶吉士授編修官至工部侍郎有靜娛室偶存稿

詩話春湖督浙江學政方按部衢州聞本生父訃痛毀卒於舟次以衰經斂生平無他嗜好獨嗜金石文

字所聚名拓至數十百種築湖東樓皮之中以漢夏
承碑隋丁道護啟法寺碑唐虞永興夫子廟堂碑褚
登善孟法師碑爲尤世稱臨川四寶詩承家學晚益
精進新化鄧湘皋謂其醜醜古厚澗然以清簡然以
遠沈思孤往而歸本於性情之正志趣之高云

江夜懷陶丈季壽

滄洲歲將盡久與親愛別晚霞帆際沈晨鷗棹邊發勞人
耽曠放物外意多說返景明寒漪塵容寫清絕掩篷悄獨
吟窗影動江月冷氣逼襟袖耿耿抱冰雪因念庵中人端
居警徂節

酬翁覃溪先生見贈會稽內史銀印歌

永興書傳右軍法碑楷無過孔廟堂西安城武重勒石善
本舊推樂蔡張吾齋墨緣幸萃合敢例三篋收遺亡先生
長歌昔題記爲我載廣銀印章謝表兼摹羣玉刻篆書八

字銜具詳黃銀印出晉內史三百年後傳有唐官以人重

印千古那數會稽驃騎王玉麟牢鎖有誰見異代出作虞

書祥瓊文照耀石墨字光怪所聚神鬼藏當時奇祕忍輕

與山陰遺韻東觀揚銀青光祿添故事寶帶不換梁公房

用太宗賜房元齡黃銀帶事乃知精靈契翰墨鶴口銅硯殊輕儼昔人

典鶴口二字得銅硯一枚見米書史惜哉金石就淪絕後人數典徒煌煌我

今前後三舊拓併此臨卷珍琳瑯何殊永興書石罷永和

文物歸佩纓牙籤犀軸錦裝褫要附至寶緘青箱虞戈夜

燭牛斗氣蘇齋妙蹟爭騰芒陶鎔頑鈍受心印庶免算子

訶香光香光有學虞輒成算子之語

雨後壺山看桃花已過半矣

塵中那有插腳處閉門聽雨春將暮今朝好鳥喚新晴攜

酒尋花過江去人爲花忙花待人咫尺不隔仙壺路繁英
縱減饒嫵媚灼灼餘霞紛綺布蝶闌鶯咽客始來風軟雲
輕天若護我今閑放無町畦萬事拋除付芒屨

喜陳文恭公元孫哲臣以解元掇會狀因寄

矯矯文恭五葉孫南交科第駕中原三頭掌故今雙絕

本朝

自錢湘船先生得三元後今始再見

千佛名經古幾尊

唐張三頭至今纔十餘人

獨秀高

擎天極柱一枝青出桂林村

文恭世居桂林之橫山村

相期位業齊王

宋

宋王曾宋庠皆以三元爲名宰相

培違

文恭堂名

詒謀屬相門

臚宣大宋已更名

哲臣原名守齋臨場易名繼昌

世美家聲叶鳳鳴剛道

珠巖浮柱合又傳石刻滿城驚七千里外荒真破三百年

前識早成聖代得人方共慶肯教溫飽負平生

前明正德二年雲南

按察司副使郡人包裕游玩珠巖詩刻云巖中石合狀元徵此語分明自昔聞巢鳳山鍾王世則飛鸞峯毓趙觀文

應知奎聚開昌運會見臚傳現慶雲天子聖神賢哲出廟
堂繼軌策華勳注云伏波嚴有石下生如柱向離石二尺
許議云嚴石連出狀元至是石將連矣詩近
淺俚後四語與哲臣名字悉合亦一奇也

重陽前一日朱楚亭龍山書屋看桂同鄧湘皋孝廉

作

數椽僻近棲霞寺遶屋長松間叢桂舊家喬木存百年儒
素清芬傳累世居貧芋栗尙能辦每爲看花供客醉過橋
數武香已聞入門但見翻青翠含丹吐白殊蘊藉不比春
嬌爭獻媚幽貞合伴月娥獨仙隱如偕商皓四桂兩丹地
偏十掃俗喧囂人冷都饒秋氣味渴呼茶茗倩兒童醉倚
芙蓉當姬侍花開酒好憶前年雨散煙消餘幾輩攀援容
我手斧持封殖憐君角弓廢謂其兄商飈颯颯吹短鬢日
夕婆娑影相對當時玉貌是嬋娟此日霜華賸憔悴天上

高寒歸不歸山中偃蹇歲復歲浮名唾手時易去清景留
人興堪繼不須重九問明朝眼底龍山卽高會

庚辰秋杪同鄧湘皋孫冶山家弟小松步出城北至
虞山小憩南薰亭

驚飈不暫息慘澹昏復晝默坐兀若癡出門逐朋舊循城
繞而北迤邐穿巖竇洲渚遠蒼蒼煙樹疏帆逗黃葉蔽村
塢境轉愈深秀靈宮閉寂寥皇潭咽寒溜披榛往迹湮登
眺倚層構沈抱鬱未舒遠愁動奔湊薰絃闕餘響玉立萬
峯瘦杳杳蒼梧雲不見重華狩

屏風山尋范石湖所題空明洞壺天觀慨然有作

隔江傲雲屏近有滄灣繞壺中別天地日月自昏曉邃宇
謝焚楣喬基擁城堡我從七星外笑指天囷小

洞中有石
高丈餘圓

如困 罽入三昧門石湖壺天銘云此三昧門博施游者闔山大羅表下界煙

濛濛始學鸞驂矯蠻荒囿耳目誰復恣幽討坐令糖霜戶

據此冰霞島洞為拈蔗者所據煨塵黜四壁拏龍失鱗爪豈惟玷

貞白文字蕩如掃大雅今寂寥長懷石湖老

與諸子游隱山六洞

瑤蓼攢列外一邱如敦覆外貌不炫奇百怪在其腹佳游

挈幾輩微雨滌時燠閑隨西郊雲並入丹霞谷陰森日色

斂古像予元肅先生矯猶龍厥德貴潛伏豈愛此山名遂

駐東來躅石琴闕餘響玉子冷殘局水流花自開飛出白

蝙蝠年來慕仙隱彌復戀幽築我祖葺亭宇山寺為先童大父所建

時游釣熟題詩徧蒼崖而此遺不錄山靈得毋笑厭雞愛

野鶩溪月自古今吾宗句可續六洞為唐李渤所開其間別隱山詩云惟有隱山溪

上月他年相
望兩依依

春日同人過壺山看桃花卽踰七星山背出補陀巖

至棲霞寺小集

年年踏徧壺山路遠近桃花幾萬重花好不知人面改山
青長似佛頭濃草痕匝野鋪芳薦鶯語多情引瘦筇地下
酒人吾所與祇須爛醉付千鍾

漢淳于長夏承碑

無錫華夏中甫真賞齋舊本後有

賦云夏承襲壽漢碑是也後歸吳門
陸謹庭孝廉碑闕三十字蘇齋補書

華中甫齋真賞著夏承襲壽道生賦婁碑不見夏碑存謹
庭祕笈來吳門東京隸法評奇古咄咄殊難一二數數行
論贊豐與楊闕三十字翁書補堂堂筆陣推中郎此語傳
之秋澗王建甯刻先石經石體沿篆籀垂楷則陰陽闢闔

星雲攢如戟森豎如弧彎神姦慌惚窺夏鼎威儀肅穆參

漢官惜哉未校義門本得自丹陽少剝損義門得丹陽孫仲牖本剝損僅

二十餘字廣平履蹟人間多寶者不獨徐芳遠道生跋此碑云今廣平有碑乃

永樂間俗人重寫吾鄉徐芳遠遂以爲法無乃寶燕石者邪華山拓見今阮公酸棗蘇

齋摹亦工芒角體勢參假借書豐作豐從同曾見阮雲臺尙書華

山宋拓本及翁覃溪先生所摹酸棗碑豐皆作豐二碑前人並謂是中郎書卽此字之假借與夏碑洵出一手華

家雕落謹庭死千七百年留一紙芝英見瑞豈偶然前此目此

碑爲芝英體過眼雲煙良足紀

隋丁道護書啟法寺碑何義門太史舊本手題簽存前後有研山堂印孫承澤印

最後有魏國公印爲宋賈秋壑鈐記

隋書罕署名道護碑傳二開皇仁壽年興國啟法寺後來

信居上書老筆亦恣六一得其精胡乃楊本嗜一夔殊已

足觀樂他且置骨體肖龍藏倍溢妍華致化度雖後塵右
方闢緘祕悅生堂不錄銷夏篇不記兩家印篆留近入義
門筭氣壓集古千源導貞觀四其文頌金像頗說佛靈異
我聞菩提法妙具千手臂法法皆圓通始了第一義丁真
合同參誰問楞伽字

唐虞世南書夫子廟堂碑

唐石原本得千有四百四十六字缺字僅四之一以

陝本裝補前有康里氏康里傳修二印後有雲門山樵張紳跋蘇齋考證甚詳

黃銀印賜著作郎世間石墨珍瑤琅畫腹藝精從道悟如
神筆妙知器藏文辭書翰皆可喜一時氈榻來四方周額
削後石剗缺越千餘年寢散亡舊本並希城武陟原刻漫
溯貞觀唐山谷昔賞榮咨道月峯曾錄韓存良我生已晚
去古遠南轅北轍徒假假何期神物有呵護康里元冊留

唐裴唐初同文變六代東觀帖出無道場郎官石記誰遽

擬

見王元美敬美郎官記跋

九成化度差頡頏巍然太華秀真骨後來

宛列兒孫行全碑僅闕四之一補以摹刻中令王圓機殘

字人爭購此拓豈止千金償乍驚秀朗過智永匪特峭勁

如歐陽魯器不敬見中正隋珠在握含光芒層臺緩步行

人選雍容合傍夫子牆金聲玉振躋大雅龍蹲鳳跼開文

祥若準孔門用詩例譬曹入室劉升堂昭人穎達具虞法

下儕潘陸坐廡廊當時五絕褒祕監獻規一體觀文皇右

軍腕助天戈舞北堂文播儒風揚俗學但以書貌取毋乃

優孟之冠裳天吳紫鳳久顛倒而況錯雜淆元黃覃溪老

人霜鵠眼賞論不數雲門張考證諸家負真鑒何王徐輩

所未詳

義門翦林壇長

問字日就草元閣百花放豔虹騰光子山

篋邀文靖賞虞家筆讓來兒颺匹夫懷寶不知戒敢謂家
學私青箱擬謀鑄字光宅手重排曲阜階楹旁斯文廢墜
儻竟舉几研小胥猶可當

唐魏棲梧書文蕩律師碑

碑在許州陽翟縣立於開元十三年趙明誠金石錄

注魏棲梧書此本翦去魏名竄取碑字託名於褚以增價後有涿鹿馮相國手跋云褚書祿帖等皆表表耳目間此碑不一二見蓋已驚異爲褚蹟矣王勣林竹雲題跋內辨正最確覃溪先生重書翁林跋語改題魏棲梧籤並加考證

買褚得薛前聞曾我今所得添嘲評文蕩師碑錄明誠魏
棲梧乃褚名更嬋娟來遲羅綺勝是耶非耶宛平生馮公
擊賞逾蘭亭有若似聖子夏盲翁王後先詳證明洗出真
面廬山青河南遺法二薛承薛稷亦是魏家甥當時薛魏
世並稱北海仙手太湖精開元之間繼有聲棲梧合系宰

相徵不見姓字唐表登石趺久化夏后城僅傳此紙仍難
憑古來幾輩書入能一藝並慳身後名消磨歲月三折肱
捧心喪志予其懲

周系英字孟才號石芳湘潭人乾隆癸丑進士改庶吉
士授編修官至戶部侍郎

詩話石芳初官少宰值鄉縣土客民交鬭牽連降編
修尋罷歸道光間復起嘗自題小象有曰髮雖白而
心丹骨不媚而行果
蓋正降編修時也

感懷

回首家何在孤丹客可憐夢魂驚子夜鬚髮感丁年雖卓
應無地萍浮只信天所嗟親已老生計尙茫然

趙佩湘字芸浦丹徒人乾隆癸丑進士官給事中有恆

春吟館詩集

華陽洞

華陽福地南朝舊繼隱真人共溯陶桂殿三層凌碧漢松
林一帶捲晴濤鹿眠洞口煙光暝鶴舞山前月影高宰相
神仙空想像鬱岡館裏首重搔

偕楊蓉裳農部同至草堂祀黃文節公生日

結伴城南去來尋舊草廬觴稱山谷壽人集杜陵居翠展
牆頭竹紅翻水面蕖關心年譜缺誰爲補全書

深秋夜坐自然庵

依山結屋自然幽茶半香初月上鉤雁陣人驚秋信至鶴
巢花藉夕陽留一棚松影當窗護千頃江流對面收閒坐
僧寮參妙諦忘機我欲狎沙鷗

贈揚州李海峯

斗山回憶廿餘年兩世相依思妙綿藉藉文明齊北海飄
飄詩句繼青蓮浚雲願遂天衢上映雪功深几案前更喜
承先能養志重闈還有地行仙

吳貽詠字惠連號種之桐城人乾隆癸丑進士官吏部
主事有芸暉館詩集

卻聘行爲晉陵錢魯斯

伯炯作

妾家家近耶溪曲蛾眉掩映湖光綠浣紗不學苧蘿人自
託幽貞在空谷使君夜譙花滿堂粲然遺我雲錦裳感君
高誼何能忘漢陰有女垂明璫春日潛行漢水傍頭上金
釵列鳳凰腰間寶玉聲鏘鏘名門上絜姬與姜此女翩躚
天且麗香風落地圍珠翠使君五馬東南來與君攜手青
陵臺使君桂楫蕭湘渡與君俱入江南路江南三月花滿

隄桃李千蹊復萬蹊
嘒鶯飛入落花去
君問垂楊那得知
白下遣懷

飛絮飛花又一年
莫愁湖上草如煙
長亭送客青山近
短鬢傷春白日眠
天際雁鴻遲錦字
閨中兒女卜金錢
秦淮十里盈盈水
錯喚樵陽渡口船

李廷芳字湘浦歷城人
乾隆甲寅舉人官南海知縣有
湘浦詩鈔

自盤豆驛至潼關道中

迢遞三秦路
征驂凍不驕
風聲走函谷
雨勢壓中條
地扼重關險
河流九曲遙
華峯天外落
仙掌又相招

張懷淮字玉溪漢州人
乾隆甲寅舉人官甯晉知縣有
磨兜堅館詩鈔

登觀音閣

石磴盤空上枯筇健可支春隨紅雨亂峯抱白雲癡舊跡
飛鴻印游踪怖鴿知夕陽尙留戀莫怪下山遲

魏野草堂

捷徑終南跡已無草堂猶聽野人呼大名君相煩徵召小
隱溪山入畫圖劍外謳吟間寓客窩中安樂老潛夫長途
消盡輪蹄鐵鄉里高風說益都

宋茂初字實甫高郵人乾隆甲寅舉人官宿州學正有
碧虛齋吟草

詩話實甫少時嘗作乙丑紀高郵水災詩二十四首
爲總督鐵梅庵方伯許秋巖揚守伊墨卿所賞因之
請振於朝仁言利溥傳者敬之詩品醇正如其人斷
句如土壤餘幾何一心爭華嶽功成輒揖去磊落誰
云非依人爲進退何處
非險仄其志行可見

八月七日同澹人平山堂訪桂

出門百里餘風物便清美孰爲同心人邂逅忽在此病後
不自憐倔強若有恃忘從辛苦來翻然各欣喜行樂宜及
時惜費真可鄙此意天公知秋光爲君霽

樓觀何連翩得橋爲結束過橋一騁望晴波浸涼綠楊柳
臨風疏蒹葭傍水矗披襟對夕陽泠然秋意足山水多清
音豈在絲與竹無心鳬鷺羣上下自相逐

香氣空中來欲著游人衣入門樹下坐樹老花半稀淮南
古名勝小山今是非此桂占此境知復誰所遺婆娑莫歎
息外瘠中愈肥不見歐公柳長對吳岫微

回舟暮色蒼張鐙促晚宴酣嬉雜詼嘲酒紅初被面隔船
多窈窕清歌拂紈扇夜深人意闌湘女逞靈變笑口誠難

開莫怪恣游衍聽歌且緩行船頭月一片

趙北口

山勢東來奔萬馬山行十日無完袴生愁亂石摧車輪忽
現汀洲意瀟灑晴波一碧杳無際燕趙中間大如礪晚風
斜掠渙鱗生織成萬頃韡紋細長橋卧水垂虹霓橋畔帆
檣雁行列人語喧闐雜亂鴉鎧火黃昏照殘雪我家三十
六湖濱慣向煙波采白蘋尊前共羨雙魚美忽憶淮南二
月春

雨中作

東風吹雨到重城古屋蕭森罷送迎簾護濃陰催暝色檐
飛急溜作泉聲落紅殷地榴初褪淺碧侵階蘚又生最是
三餐纔報罷短童攜出瓦鐙檠

宋繩先原名繩祖字步武號松澗膠州人乾隆甲寅舉人官嘉祥教諭有松澗詩橐

下清宮

仙觀藏何處蒼蒼竹拂雲天疑山樹合地與海濤分樵斧鳴幽谷漁舟泛夕曛游人煙靄裏鐘磬但遙聞

王曇一名良士字仲瞿號螽舟秀水人乾隆甲寅舉人有煙霞萬古樓集

詩話仲瞿權奇倜儻好談兵甲寅舉解首出吳白華總憲門時方有兵事白華疏薦謂能作掌中雷爲仁廟所深斥後屢上公車不第行益不羈詩有意求奇留侯祠一篇爲世傳誦正與王季木項王廟詩相似

焦山夜泊

華嚴靈館壓嵯峨一片風煙接寂寥大地星河圍永夜中

江燈火見南朝魚龍古寺三秋水神鬼虛堂八月潮獨上
數層捫北極滿天風露下銀霄

留侯祠

子胥鞭楚楚不絕留侯入秦秦卽滅英雄爲報一家仇何
苦漂流萬人血胥不得佐太子建良不得佐韓王成不爲
赤松走幾爲猛犬烹功人功狗兩無益徒受亭公謾罵名
張良不食穀李泌不娶妻早欲祠黃石何如老白衣君不
見五湖范蠡載西施一舸鴟夷去已遲魯連不忍秦皇帝
密鑄亡秦一柄鎚

孫古雲襲伯辭爵南歸相見於西湖文靖祠堂

正好明光執戟時鍾繇膝疾易調治元成讓爵何其早孫
綽還山不覺遲處士梅花半湖水相公香火一樓詩歸來

不踐明湖約焉得騎驢載酒期

登翠微亭

江中日落衣帶圍西風吹人人不歸水禽膊膊水中落有翅不得空中飛拍手呼山山欲笑老馬銜枯向空叫君不見晨風兒布穀飛來化爲鵲朝游武昌雲暮踏海西石滿山紅樹一江風萬里長空遮不得

金孝槐字蔭山號屏碧嘉興人乾隆甲寅舉人有小山閣吟藁

曉起長安道中

野店雞聲唱曉寒一鉤殘月墮林端紅樓夢裏何曾識付與行人馬上看

蔣湘培字篤因湘鄉人乾隆甲寅舉人有莫如樓詩合

刻

歐陽礪東曰篤因博學多識詩於魏晉唐宋諸名家貫穿出入少本豪邁晚乃寄興疇曠其季弟師大專主浣花詠古諸作沈鬱蒼涼才氣尤不易觀惜均早逝未得卒業仲氏叔氏為詩不多然寫卉物之清芬寄素心於歎詠想見一時叶應之樂也

詩話篤因與弟湘壩湘城湘垣俱以文鳴時稱四聯合集為湘垣所編湘壩孫益澧後官廣東巡撫為名臣乃重刊之陳蘭甫以比唐之寶氏聯珠集宋之柴氏四隱集篤因及湘垣詩尤傑出

讀淮陰侯列傳

長樂倉皇壯士死天下心悲漢皇喜漢皇何喜民何悲歡歌乃在深宮裏呂公息女老莖毒滅火禍胎真禍水內蛇氣餒凶灼天龍鼎彭亨思染指庭中健者韓將軍與噲等伍心尙恥生存肯作呂氏臣俯窺產祿狐豚耳鐘室幸為兒女詐梁王蒞醢東都市良弓走狗去幾盡炎祚傾危竟

何恃發蒙振落眞易與天下大勢可知矣長陵魂魄如有
知當時何爲斬壯士

褚僕射洗筆池

永徽往跡留清池老苔半頃函玻璃野色淒淒映江綠墨
氣馥馥浮雲姿池上有廟繪古像我來展拜魂神爽當年
臣節懔冰霜猶覺丹心走魑魍卻憶文皇顧命時佳兒佳
婦卿扶持先帝胡爲作此語無乃早見恩乖離當時才人
正入侍何不及芟鸚鵡翅可憐禍水起波瀾撲殺此獠方
快意嗟公此心勁如鐵臣軀可捐節不折潭州去國幾千
里孤憤飛作炎天雪行步偶來湘浦口濡筆徑展雖沙手
至今池上風雨夕髣髴蛟龍夜深走千秋事往如雲煙卻
想臨池讌集年狂歌歡詠亦偶爾長安不見應潸然神龍

御天唐再造洗日咸池甯足道孤臣曲突竟何爲零落豐碑卧秋草誤國李許名誰馨精氣蟠鬱池爲靈我欲從公乞筆札寫詩上續離騷經

永福寺

倚檻溪聲繞碧岑開窗雲氣落衣襟青山有畫漁樵路古佛無言鐘磬音谷口煙霞秋似染寺門松栝晝常陰名花翠竹俱零落倚仗空林時一吟

傳寺有方竹幾
牡丹今無存矣

秦皇廟

虎視當年亦壯哉千秋遺廟枕巖隈依然王氣東南盛不見仙人海嶠來事去雄猜終束手運窮付託況非才如何倒海迴山力不救驪山土一坏

山游

高山如梯空突兀露脊背下臨小坡阜波濤浩破碎婉孌
多餘妍奇怪或分外青蒼雖一氣俯仰各殊態攀蘿陟層
巔跨險入幽靄天工信好事乘酣作狡獪當其抒壯藻往
往得奇概上有幽人居似保清淨退偃月作巖屏裁雲出
松蓋頗疑蘇門徒青眼非我輩余亦棲遲人清輝澹相對
逍遙久忘歸終焉謝塵壒

縹緲峯詩

古人詩云眾峯羅戶前余戶外諸峯有縹緲之勢卽名之縹緲峯用天隨子縹緲峯

韻賦之

鬱乎何蒼蒼茲山峩然起卻臨青冥上迴出虛空裏決非
渣滓成想像結構始縱橫布遠勢天外知可倚或銳如持
矛或平若授几崢嶸勢疑怒平遠情類喜陰晴變斯須光
怪難偏視鴻鑪作鼓鑄大化供磨砥仰峭鑱諸天俯臨排

埤蟻元精浩茫茫萬古如未已吁嗟攬氣象豈直論道里
遠矚瞻青蒼卽之微茫耳吾聞列仙宮往往通帝展苟非
眞靈宅絕景孰私已疇能乘元化舉手摘瑤藥一承帝臺
觴如洗功德水儻有新宮銘誰云東平子買山如可謀叩
門訪誰氏

東武吟

漢帝求故劍嬪御皆涕零魏王棄前魚左右多歎聲賤子
少年日早希烈士名出身承主恩萬里事遠征追虜交河
北蓼食朔方庭徒手冒白刃俯身擐前旌朔風浩浩來塞
馬慘不鳴孤蓬雜沙飛天地忽晦冥短兵怒相接血濺單
于腥朝射南山虎夜宿醉尉亭何人知故將窮老甘伶仃
道逢羽林兒顧盼生光榮錦帶鸛鵲裘車馬浩縱橫時移

貴賤異事去炎涼更願慚麒麟閣虛望嫖姚營蒼鷹思一擊老驥忽長鳴仍蒙伏波將不愧班生銘

潁許間雜詩

潁川日夜流潁水何瀾瀾昔云沈冥人臨流洗其耳投以萬乘言蹴爾如撻市耳且不欲聞況能強之仕道逢收犢翁牽飲上流水顧視世間人羶腥誠獨鄙甘瓜何縣縣白石何齒齒持比潁水清吾心正如此

言訪阮公里亮節追慎密冥心視時流擾擾蚋與蝨譬如虎豹叢寄此鸞鳳質偶然作步兵帥幕時造膝處亦不成處出亦非爲出徘徊污濁間獨以酒自逸時時哭窮途心事無人識

詠史

鬱鬱青楓樹歲久成枯株鴟鴞巢其顛失路委泥塗高明
逼衆怒傾奪在斯須李斯相秦皇六國爲邱墟失意車府
令隕身家亦屠韓非亦何人乃如兔投罟位顯實疾僨名
高成禍樞不見蘭陵令衰年方著書

野興

野興維難適幽期肯重過孤雲兼石瘦老樹得秋多衰謝
將時遠棲遲賴酒和晚涼聊隱几處處有漁歌

歐陽輅原名紹洛字念祖號礪東新化人乾隆甲寅舉
人有礪東詩鈔

詩話礪東在嘉道間與同郡鄧湘皋
學博俱以詩鳴陶文毅尤推重之

遠行

貧賤不可久志士思遠行登堂拜母氏殷殷詢所經心知

去無期強言計歸程驅馬出里門漸見井邑更揮手謝賓
友欲以致中情心牽慈母愛哽咽難爲聲兒生老鄉閭身
世終何成庶幾取令望歸以爲親榮

行行何所至乃至長安道長安古都會託跡非草草朝見
冠蓋集暮見歌舞巧裘馬飾輕肥嫺戚多姣好顧我山澤
姿夷之等傭保窮年抱名刺四顧無可造人生各有得於
義未容撓安能隨波流弓身以求飽

和仲玉丹集呈李司馬

銀箏羯鼓隨玉簫陽春妍麗風日嬌煖雲撲天鶯舌調美
人笑倚雙蘭撓銀青帔子金絡條明璫寶髻光動搖彩袖
輕漾試舞腰迴眸送睇歌且謠忽輦若嗔睨若驕忽遠若
避近若招雲煙翻騰風亂交轟然四座歡聲囂樽前玲瓏

世說新語卷一 下
三
解華貂玉壺滴酒珍珠跳醉來粉黛生暈潮哀絲長甲爲
君挑願君千壽齊松喬

宿南陂

洞門雲氣掩餘暉風葉蕭蕭亂打扉破屋夜涼知雨過空
林鴉噪有僧歸苦淹人事真無那便息交游未覺非寂寂
南亭山色裏卧聽清梵欲忘機

寄答仲玉湘上見懷

白壁徒遭按劍看湘門風景又秋殘世途吾已肱三折歸
路君甯首兩端故渚正漂菰米黑微霜新點蟹螯丹濱沅
千里煙波闊早晚相從理釣竿

過繼之宿

溪北溪南兩玉屏雨餘嵐氣倍青青但教山色終年好何

礙柴扉竟日扃竹瓦小樓延午話石牀殘暑坐風櫺酒闌
笑索林間味知有園蔬萬菊釘

晚登橫州城望

落葉聲中日又殘荒城清夜此憑欄九秋星斗盤空大萬
壑風濤捲地寒了了鄉音知雁戶粵中大半皆
吾楚徙居者濛濛山色
是珠宮盧敖漫自貪奇勝未覺人間八極寬

中秋對月有懷家兄在楚闈呈同座

秋暑漸退秋光涼秋月上階窺我堂人言此是中秋月此
夜清光更清絕銀濤滾滾飛向天玉露泠泠灑如雪廣寒
宮殿知有無但覺霜華沁人骨我被秋雨相欺凌快對佳
月如佳朋一年見汝幾回好每念契闊情難勝惜君行又
別我去使我一室孤如僧不辭且盡杯中酒一觴引滿爲

君壽忽憶湘南秋橘香今宵甕算君知否

柳川道中

楚雲南望獨宵征天際悠悠指去程千點亂山縈象驛一
痕殘雨下龍城寒林照眼知秋氣遠瀑盤空作怒聲自笑
蒼黃埃霧裏據鞍詩思尙縱橫

重過紅鶴庵題壁

映水苔扉百尺懸雲巒煙樹遠鉤聯驚心桑下曾三宿彈
指天南又幾年山色青憐春雨後江聲寒落酒罇前他時
重問楓門路可許經臺續舊緣

衡江逢陸子羽之江西賦別

衡山弄影清湘水一朵青煙沈水底江頭秋月送歸人盡
夜舟行雁聲裏衡陽東行望廬山長江路繞長雲間北風

吹衣歲欲晏陸郎去矣何時還

留題李中丞宗瀚湖上山莊

憑欄無數青山好都在湖波潋灩中盡日煙嵐自來去多情魚鳥亦玲瓏長廊午寂聽松雨小閣新涼坐竹風珍重主人留客意不應歸騎便怱怱

題呂氏家傳後

北平呂季璋秀才遇余於益陽舟次酒闌出家傳相示云其六世祖僉事

公舍於勝國天啟間上書論邊事斥閹黨謫死嶺南顯死猶作書欲致當事而有司無敢達者此公子士儀收遺骸歸始獲草於衣帶間辭旨憤切若不知其前以言獲譴者吁其可悲矣今書具詳傳中士儀亦以甲申率鄉義勇死國難余惜夫館士之死節而史無傳焉賦此備徵歎者採訪云

遺老都教一網除紛紛猶復假邊儲疏中言內驍四出額外誅責皆以邊餉爲名百年親見銅人泣萬死誰傳雪窖書冤鳥猶思石填海怒蟲休笑臂當車前朝舊事那堪說簡臺摩挲抄恨有餘

濱口雨後晚發

漠漠輕陰來遠墟濛濛晚色滿平蕪寒星映水乍明滅細
雨颺風時有無漸覺潮生沒洲渚坐聽舟過響菰蒲此情
誰道寂寥極有酒徑須千斛沽

錦石峯寺小憩憶僕年二十六七時此間游處經歲
不勝今昔之感也

古寺雨餘苔滿扉老藤垂陰周四圍溪風吹酒坐來晚山
鳥狎人鳴不飛舊社僧徒已無在當時居鄰今亦非眼中
故物定誰是羨汝錦紋雙石磯

王以銜字勿庵歸安人乾隆乙卯一甲一名進士授修
撰官至工部侍郎有閒燕齋詩存

詩話乾隆乙卯竇東臬主禮部試一二名皆取浙江
卷榜發勿庵第二其弟古彝第一一時頗有煩言和

相本不嫌於東臯欲以此傾之事叵測勿庵應廷試
草草以淡墨書卷和相充讀卷大臣有所私誤認勿
庵卷卽是置第一及臚傳高宗以淡墨爲嫌和相
奏淡墨能工其於書法誦甚深乃定元及拆卷
上問此會元耶和相奏此會元兄乃曰汝豈亦與有私
相以方力薦不致不自承上乃曰汝豈亦與有私
外間語故不足信東臯事乃得解勿庵端
厚和平履屯而得亨一時僉謂非倖致也

秋日晚眺有感

紫清城郭蘊高寒
墜道飛廉接上蘭
山色萬重連雁塞
河聲終古落桑乾
東京禮樂張衡賦
北闕勳名貢禹冠
十載春明緣底事
愁懷遙睇碧雲端

四海朋儔一子由
豪吟風雨鳳城秋
文章漫詡蓬池鱸
身世原殊閣道牛
徐邈百杯頻中聖
杜陵萬卷傲封侯
騎鯨一去憑誰問
蕭颯商飈白雪樓

陳廷桂字子犀號夢湖又號花谷和州人乾隆乙卯進

士厯官奉天府丞有香草堂詩略

楓橋泊舟

山寺昏鐘隔水清
溪煙漸暝闔閭城
吳波不動酒船出
終夜月明聞鶻聲

聊城懷魯仲連

六國無奇士先生世所傾
雄談卻秦帝飛矢下聊城
玉貌千秋重金章一笑輕祇今東海水浩浩有餘清

訪李西涯故宅

相公邸第碧湖濱
千畝紅蓮間白蘋
一代匠門韓吏部十年綸閣漢平津
餘風繼布留高唱遺憾泉臺見故人
終古湘江煙草綠子規啼斷楚鄉春

秋夜有懷

雨後新涼下碧梧鄉心一夕雁南徂寒蛩白露秋深淺破
屋青鐙夢有無花萼樓空衾枕寂竹林人去酒樽孤買山
錢向何人貸十載春明祇故吾

懷孟葦庵

峴首雲嵐漢渚煙江城景物果堪傳眼中不見襄陽老釣
得槎頭一惘然

鄭陽使署古柏爲風雨所拔歎

世間舊物不多在泰山秦松孔林楷霜皮鐵骨人不如曾
見黃塵起東海鄭陽八柏栽者誰一一黛色青銅姿支離
偃蹇屹相向蒼然五老森鬚眉使署庭前兩株立太陰沈
沈白日匿飢鷹側翅不敢窺逡巡卻恐蛟龍得我披繡衣
歲一來造次不踏階前苔八窗晝閉坐昏翳慮驚幽暗精

靈猜崇正年間亂離久黑山銅馬縱橫走城中瓦屋燒作
灰遺黎都成喪家狗此相僵立烽火中似有神鬼阿虛空
蒼髯古貌閱人代至今天矯排天風人生有生復有化已
見三株峴崩謝天精下追雷斧喧此老摧頽忽霜夜醜形
怪狀今已無耳畔髣髴聞嗟吁畢宏韋偃不可見恨不早
寫蒼龍圖

沈樂善字戢山號秋雯天津人乾隆乙卯進士歷官貴
州貴東道有黔中草

夜宿雲母山

一徑緣松腳巖扉鎖石清溪雲釀花氣山雨入泉聲筍蕨
僧廚味壺觴旅客情薄眠空翠裏竹月夜深明

周有聲字希甫號雲樵又號東岡長沙人乾隆乙卯進

士厯官蘇州知府有東岡詩贍

詩話東岡尊人乾三觀察克開乾隆丁卯舉人出宰隴西甯朔守太原分巡贛甯抗布政使坐事戍軍臺復起督浙江糧儲在太原時嘗雪冤獄疏積潦民稱其德東岡作太原紀事詩述之甚詳迨入官亦卓然有風力躡而復起其舉於鄉出姚惜抱之門從受詩法具有知幾詩中開皆作閩避家諱也

清嵐山

人家住峯頂我行時見之遂逾數百折始獲叩茅茨主人拂塵席邀我憩征疲村居不四五往往絕煙炊攜榼請饌具日暮空筐歸未知有蔬筍況乃思甘肥提壺試斟酌不辨澠與淄豈無飢渴情何爲異肝脾謂言百尺巖九仞不及施昨逢十日雨衆面生光輝自從五月來誰復陳巾匜悲哉人間世生理乃若茲我勞尙不解彼困何能支明發舍之去相看俱涕洟

少陵草堂

詩人未合享茅土少陵草堂竟千古逾阡度陌一相尋此

間亦是城南杜

地亦在成都南門外距昭烈廟不數里

喬林森森徑旁取隔

斷鐘魚同法鼓

草堂寺在草堂之左由寺門取徑右行

短垣曲路轉修蛇十

丈青鸞作行舞升堂氣象自完肅廊榭敞斜尙枝柱雖然

雕落餘結構譬過衰門賸規矩浣花溪水碧溶溶還照高

寒好眉宇傳聞此堂昔顏廢往往題毚竄榛莽邸舍闔從

異姓王新宮煥作神仙府

乾隆年間福郡王建節蜀中以此爲行館遂大加修葺

一

時奔走盛簪紱供張紛綸雜牲脯行廚花裏玉盤來猶似

江干駐嚴武轉眼繁華頓消歇空令勝蹟隨風雨客談往

事殊歎嗟竊念古今增仰俯人生豈藉勢力存姓名不共

榱椽腐秋風當年竟卷卻百代詩城自堅樹那須唧唧效

寒禽戢翼卑棲計毛羽君不見馬家宅與奉誠園畢究遷
移誰是主

鳳縣道中

直到青天上何知徑路分巖巒森氣象風雨極聲聞石勢
存危棧林煙續斷雲客衣殊太薄歎息此勞筋

偶興

涼風颯颯度前除獨樹蕭條伴索居人比僧閒耽習靜月
先鐙上照攤書吟高便欲爭兒讀瓶罄終猶賴婦儲一笑
年來博囊粟未知誰得食吾餘

夜坐

老覺腰魚重不禁宵分百慮感侵尋松楸山徑荒逾昔荷
芰平湖夢至今破屋鳴機寒女怨故巢移樹夜烏吟統如

街鼓朦朧月誰識空齋寂寞心

電白署中與魏丈春臺話舊

電轉蓬飛詎有因天涯忽此共殘春
刪詩不厭頻塗乙飲酒何妨竟過申
感事便同蕉鹿幻觀心漸近木雞純
誅茅他日應從老未要官袍穩稱身

梓潼縣

不到潼川縣安知棧閣懸城孤纔得地
山拓漸容天樹色旌竿直江流藻繪鮮
神靈儼祠廟一爲指星躔

樊口晚泊

樊口傳幽勝輕舟向夕維天空江氣靜
風定暮帆遲繞樹烏三匝推篷月半規
還憐蘇玉局遷次幾年時

喬遠炳字黼文孝感人乾隆乙卯進士
改庶吉士歷官

刑部員外郎有續香齋詩集

夏日

薰風愜解引新涼
小暑神清夏日長
斷續蟬聲傳遠樹
呢喃燕語倚雕梁
眠攤薤簟千紋滑
座接花茵一院香
雪藕冰桃情自適
無煩珍重碧筒嘗

郭楷字仲儀武威人乾隆乙卯進士官原武知縣有夢香草堂詩藁

金山寺晚望

朝日照河干茅屋炊煙起
時有曬蓑人依稀紅樹裏

秋思

秋風起木末對此動離腸
明月夜千里流人天一方
無書勞遠雁有恨等寒蟬
吟苦雜歌哭奚僮嘲我狂

過南泉隱君山居

暫脫塵機便似閒尋君我得近青山
蹇驢攔過平橋晚詩在秋林落照間

半卷道書修素業三層高閣坐憑窗
襄陽耆舊知誰似獨向繩牀拜老龐

曉至裴家營

言歸貪早發客舍啟雙扃霜逼重裘薄
風吹殘夢醒人煙辨小市山火亂寒星
莫說征途渺鄉音喜乍聽

商景泰字宗五襄安人乾隆乙卯進士官射洪知縣

望桃源洞

武陵渡口夕陽斜夾岸茅籬三兩家
笑問漁郎何處去春來開徧舊桃花

李實字世名號充之新會人乾隆乙卯進士官惠州教授有鋤月軒詩鈔

湖口縣晚泊

漠漠湖隄柳清溪月一彎人家多近水城堞半依山渡口
漁鐙出林端野鳥還蕭然夜敲枕涼夢到鄉關

泊蕪湖關

津吏遙迎客子船艤舟亭下晚晴天斜陽未落先浮月遠
水初平欲化煙江路每懷青草過旅情長向白雲懸夜寒
更柝聲聲起聽到關情一黯然

徐斡字吟香號晴圃天津人乾隆壬子舉人乙卯會試
特賞內閣中書累官山西巡撫遷光祿寺卿有吟香
室詩集

詩話乾隆六十年會試既發榜高宗特簡大臣覆閱遺卷取三人公其一也特除中書舍人直樞密府自諫垣出監河庫陟厯封疆再攝陝圻一機魯節遂拜撫晉之命復自晉移秦督軍檟修水利頌聲大作入掌卿寺以恩禮始終初入薇省五世從祖經厯公尙健在手書敦勉以濟世爲助公官中外數十年矢慎矢勤仕已無喜愠色人以爲能遵父訓云

嶽麓書院紀事

萬疊青峯壓綠幃勝游逸興託同袍尋山客集春三月間渡舟搖水一篙秀毓楚材饒杞梓詞摛藝圃續風騷懸知屈宋遺徽在爲觸吟情試彩毫

記訪煙蘿踏紫雲春山如笑草如薰源桃紅帶催花雨宿麥青連渡水雲靜裏光陰存太古風前蘭芷吐清芬下帷知有文星聚隱隱書聲隔竹聞

四壁晴嵐護講堂璇題照耀影輝煌人瞻至聖衣冠肅地

託名儒草木香馬氏紗帷春靄靄唐家玉荀秀行行宛然
觸我前塵夢禮佛橫經迄未忘

紅塵不到白雲根古佛南朝寺獨尊衡岳送青當戶牖瀟
湘飛綠上山門混茫一氣同閭闔興廢千年費討論殘缺
泰和留片石幾番剔蘚手親捫

路轉山梯境轉幽無邊新綠擁危樓半房山鎖僧寮住百
道泉穿樹杪浮水上難聞仙鶴語煙中應有羽人游方壺
未必能過此惜少茅庵結一邱

名齊山岳仰前賢古蹟微茫落照間青簡易迷千載事蒼
松猶帶六朝煙難拌拄杖窮雲壑尙抱塵心愧石泉神往
巖頭蟲鳥篆待攀絕頂細摩研

小息雲房四座春青山綠酒采蘭辰天開勝地無今古客

到同心忘主賓好鳥自調絃外韻修篁替掃檻邊塵諸君
此會休輕視觴詠何曾讓昔人

森森羣彥盡英髦倒峽才思鬱怒濤豈有珊瑚搜鐵網漫
將金玉飾鉛刀青雲鵲起期蓬閨碧海鵬搏藉羽毛好假
詩書爲麴蘖名山風雨莫辭勞

李光庭字大年號樸園寶坻人乾隆乙卯舉人歷官黃
州知府有虛受齋詩鈔

詩話樸園守黃州僅九閱月賑災有惠政不得於上
官乞歸久居京師以詩自娛篇什甚富工於詠物集
中此體最多七律如謝親家王與九贈陳酒云風味
頓增前輩感交游纔信老來親賦借人名紙通問云
善留餘地容相假從此知名也是緣賀陶鳧香賜朝
馬云徒行不可斯何地狹路相逢盡故人皆擔語有
味

謁于清端公祠

清端廟貌尙如新視昔猶今我愧今敢謂頭銜能附尾便
持手版亦甘心論功竟待三年考酬德還期百世歆此日
坡仙堪把臂流風遺澤總棠陰

掃舍

莫謂儒官陋常將敝帚儲廬爲吾所愛塵與歲俱除香穗
衣篝簇梅花紙帳舒紗籠重檢點珍護數行書

辭歲

終歲供消遣今宵忍更辭須知將去候卽是欲來時
松明快催嫌爆竹遲何如陳酒脯酬我一年詩

賀年

不作增年慨翻如晉秩榮辦香誰獨款片紙亦人情冷淡
空投刺生疏悄問名放翁偏賀號剝啄是新聲

和沈槐卿

衍慶之官留別原韻

青雲得路及華年好結風塵物色緣作吏誰真能免俗此
行何必異登仙但留政蹟憑人說勝有辭章與世傳輿論
分明史筆在循良文學不同編

鄉味

雪泥鴻爪又林亭鄉味鄉情兩不勝春到人間蘇草木老
知時務諒親朋視余如客聊憑爾謂我因人卻未曾柳下
襟期師百世何嘗風骨損峻嶒

魏瀚字南崖衡陽人乾隆乙卯舉人署武鄉知縣有節
蘊山房詩集

湘江曲

雨帶寒煙鎖畫橋湘江日暮盪蘭橈平潮一夜添新漲十

里東風五里潮

澤畔吟弔屈左徒

君山黯碧愁雲溼，鳴陽羣笑猩猩泣。靈風神雨橫江來，楚
纍游魂亭亭立。貝宮骨冷魂不死，芳根迸斷湘蘭葉。夢澤
白茅與天齊，荃蕙葳蕤辨誰是。盲瑩淚乾竹斑老，土花漠
漠埋荒草。血痕淪地駭劫灰，何處青燐凝瑪瑙。雲和澀調
不忍彈，江月有聲瘦蛟寒。嬋媛慘澹遲北渚，怨魄空聞爲
余歎。馮夷傲睨不可訴，冤咸號咷靈胥怒。幽憤抗詞動紫
皇，鬼巢翻傾元精鑄。九章懊儂復惱公，南國哀響中古風。
輶軒折軸素王萎，來者矜能注魚蟲。我願洞庭水化爲巴
陵酒，長虹爲舌南箕爲口噏。吸隴胡虬龍吼，惘澤紛拏鼉
鼉走讀騷。不須更問天玉棺，纍纍葬神仙。

黃其勤字嘉恩號舟山新會人乾隆乙卯舉人由學正
歷官無極知縣

晚過德慶

江城臨絕岸草樹望中迷落照一峯秀炊煙萬竈齊舟遲
因漲縮水遠見天低薄暮西風緊遙傳畫角淒

聶元樟字杏林定遠人乾隆乙卯舉人官茂州學正有
浩然堂集

登茂州城樓

荒齋愁獨抱落日雄關風大能飛石江豪欲嚙山羽書
連夜急戰士幾時還故里無消息悲歌鬢髮斑

王燧原名甯燧字大柱高密人乾隆乙卯舉人官聊城
教諭有穀唐集

詩話穀唐詩才力豪邁而斂之以寒瘦出之以情迴
雅有別趣與其兄熙甫甯焯同受師法於李十桐少
鶴兄弟乃駁駁
欲出家督之右

寄趙慶孫

少壯舍我去回憶如隔生古人皆百年安取多餘贏此刻
未卽草木腐此刻足與日月爭日日有明月月月有盈
數之已山積覽之無寸程人生如此便了卻而何不可齊
殤彭故人遠相問珍貺非瑤瓊遲遲久未報何以慰其情
生前之日操之已者且無據死後之日聽諸人者將安憑
寄題步武嘉祥學署遲月樓

沈沈鬱鬱天正青牢牢落落三五星荒城早閉寒悄悄亂
山叢蘊深冥冥蒼玉蚪蟠成大玦樓開正對東南缺弟子
燕息帷自下先生坐瞑燭不熱瞥眼長空生白毫晶瑩徹

骨寒侵毛常儀按轡蓄氣勢併力一湧飛凌霄頑雲轆轤
頓離脫攢峯最屬爭擎高銀闕瑤臺現突兀霓旌羽葆來
游遨神仙好此果非妄豈有棗脯能相招先生永夜常獨
寤清輝應爲先生駐何似明湖橋上酒壚邊醉眸看倚華
山樹

哭趙慶孫

百畝山田三徑資歲收杞菊可無飢種來松柏不妨晚
取茯苓還有時雲護溪堂相待久花栽江縣卻歸遲祇今
留得吟牀在網罟塵封自不知

哀湖北呂堰驛死事巡檢王翼孫

部勒新招募安能任指揮吏猶從戰沒賊亦惜官微空櫓
收衣殮孤魂帶血歸卽今各開府經歲事攻圍

昌平州作

流賊披猖日何人啟北門當時亦烏合此地忽蜂屯陵樹
枯樵采城瓢蝕礮痕客來空弔古寒日欲黃昏

謝曾賓谷運使刻先侍御兄詩集

孔融座上本蕭條張劭墳頭更寂寥海內何人求諫草江
干有客識詩瓢封函遠寄非前諾酌酒長吟當大招留取
一編問千載此情未覺古人遙

大清河舟行

一棹無行李容與曠渺間水平赴隄闊天遠引帆閒小憩
篷棲燕孤明沙立鷗卻看車馬客塵土滿征顏

游古費城北嶺寺

嶺無依傍勢孤尊帶水屏山開寺門晴潦白侵空磧界春

疇緣到遠峯根層層枯柏依巖屋厯厯雞豚對岸村卻下
西坡歸路晚迴頭殿角夕陽痕

耿玉函字抱冲號梅溪長清人乾隆乙卯舉人官臨朐
教諭有抱冲山房集

秋日游鵲華兩山

鵲華兩點暮雲中繚繞秋光望不窮幾縷晴煙遮欲斷半
沈林表半浮空

馬惠字秋水號夢橋祁門人乾隆乙卯舉人官海州訓
導有小草山房詩鈔

一絃琴

山僧有古琴七絃斷其六何不盡去之存一聊免俗陶公
昔無絃高風邈難續綠綺與焦桐塵埋不理曲聆此琴上

音一絃趣已足夜靜微風來蕭蕭動寒竹

金陵雜詩

秦淮流水暮生煙桃葉桃根鎮可憐最是秋心降不得湘
妃簾外月如絃

路斯亮字子欽號咨亭畢節人乾隆乙卯舉人

久客

洛陽兩度落花飛春色故園入夢稀久旅自忘身是客日
攜柑酒聽鶯歸

張璿華字貢植江南華亭人乾隆乙卯舉人官青陽教
諭有擁書堂詩集

南星旅夜

一徑趨平麓人家傍水湄晚墟成市處征客卸裝時夜靜

知秋爽山深得月遲把杯吟不輟貪寫紀游詩

晚晴移詩匯卷一百九終